

ادبیات عمومی و تجربی

هفته‌لق سیاسی ، ادبی و علمی غزته‌در .

جلد : ۱

سنه : ۱ ۲۴ ربیع‌الآخر ۱۳۳۵ جمعه ایرتسی ۴ شباط ۱۳۳۲ نومرو ۱۶

فاتح عصرنده اندرون هایون تشکیلاتی

جنتمکان فاتح سلطان محمد خان حضرتلری قسطنطنیه فتح جلیلی موفقیتنی استحصال ایتدکدن بر مدت صکره ، ذات شاهانه‌لرینه و پادشاهان عظام حضراتنه مقر سلطنت اولق اوزره آیاصوفیه ایله سرای برونی آره‌سنده قره جهتی عظیم سور ایله احاطه ایدیلرک وجوده کتوریلان بی نظیر ساحه دلکشاده انشا ایتدیردکلری یکی سرائیک برقمسی ، حریم سلطنت یعنی موقع تعظیم و حرمت اولدینی ایچون اندرون — حرم نام محترمی ایله یاد اولنمشدر .

اندرونه مدخل ، سرای ملوکانه‌ک، باب هایون و باب‌السلام و باب‌السعاده ناملریله یاد ایدیلان سلطنت قاپولرینک اوچنجیسی بولنان باب‌السعاده‌در . بو قاپو داخلنده پادشاهلر حضراتنک آراملرینه مخصوص عالی قصرلر ، اندرونلیرک اسکانه مخصوص معتنا دائره‌لر ، کتبخانه‌لر ، جامع‌شریفلر ، تعلیمخانه‌لر ، مشقخانه‌لر انشا ایدلنمشدر .

اندرون خدمات عاصمه‌سنده بولنانلرک رکن اولی و آمری سرای داخل و خارجنده خدمت کورن سرای خلقنکده مرجعی اولان باب‌السعاده اغاسی « قاپو اغاسی » ایدی . قاپو آغالی وظائف مهمه و معتناسنه سلطنت نکهبانلغی‌ده داخل اولدیغندن آغا ، سفرده و حضرده و جامع شریفه عزیمت و عودتده معیت شاهانه‌دن دور اولز ، یالکز صیدوشکار و تفریح زمانلرنده حفظ وصیانت وظیفه‌سیله مکلف اولق اوزره سرایده قالدور ایدی . اندرونده بردائره‌ده اقامت ایتک امتیازی قاپو اغالرینه منحصر ایدی .

اندرون ارکانی قاپو اغاسنک امرلرینی مطاوعت کامله ایله تلقی ایدرک اجرا ایتسی قانون ایجابی ایدی .

بیوک اوطه‌یه منسوب اندرونلیردن اناختاره ، پشکیره و شربته متعلق و بوکا مماثل خدماتی ایفا ایتک اوزره معیتنده درت ایچ اغاسی استخدام ایدر ایدی .

بو حق استخدام ، وظائفی آتیده کوستریله‌جک دیگر اوچ سرای ارکانه‌ده بخش اولنمش ایدی ؛ خزینه‌دار باشی خزینه قغوشندن ، کیلارجی باشی کیلاردن ، سرای اغاسی بیوک اوطه‌لیلر قغوشندن خدمتکار آلور ایدی .

بگزینور گه خیاله ، گه ملکه
 اوجه جق حالده دائمًا فلکه
 حیرت افزای ساجد و مسجود
 اوله من دنیوی بر اویله وجود !
 هر تجلیسی بونده لیلی در .
 زهره دندر او ، یا سهیلی در !

عبدالحی همد

فضولی کیبی

روحم آواره ، کوزم بی اشک ، فکرم بی مدار ؛
 فطرم محزون ، وجدانمده محنت بر قرار .
 شعره مفتونم ، خیالمدن محاسن منفعل ؛
 آهه مجلوم ، سکوتمدن فغانلر تارمار .
 شاعرم ، شعرم فقط قلبمده مدفون بر غریب ؛
 نظره دلداره ، نور حقه اولماز آشکار .
 عاشقم ، عشقم فقط جانانه چیقماز آشنا ؛
 مشرق عمرمده غارب بیک خیال کریه بار .
 گوشه هجرانده بر سرمست زهر محنتم ،
 جام وصلتدن نصیب عمرم انجاق انکسار .
 کوردیکم هر آفت نازک جمالندن اولور
 جهره حسن مجرد پرده دار اغبرار .
 لیل مغمو مده تبرید روان ایلر نیم
 وصلت امید ایتدیکم هر نازنین آغوش حار .
 روح جسممدن پشیان ، قلب جامعدن ملول ،
 کریه چشممدن کریزان ، ناله آهمدن نزار !
 دائمًا نالنده در قارشده صولغون بر خیال ،
 متصل فریاد ایدهر قلبمده علوی بر مزار !

ایلول ۱۳۰۸

علی اکرم